

UMO MU MILYONI



Nakusachila, mulongo. Nakusachila, Mulongo Shakarian.

Kabiji mwabuka byepi lukeelo luno, balunda. Kyakine kyawama kwikala muno mu Los Angeles ne jikwabo lukeelo luno, kasa kukyangye kwikala iye mbung'eno ikatampe kabiji ne kupwila kubena kwiya mu mulungu ubena kwiya pa Hotela wa Embassy. Amiwa mbena kuketekela kwimumona konkakwa. Kabiji atweba bonse tuji na luketekelo lukatampe lwa kukumanya Nkambo Yesu, kumumona Aye kokwa. Aye walaile mba Ukekalako, “pose paji babiji nangwa basatu bapwila pamo,” Aye ukekala ponka.

² Kabiji Amiwa kine Najikumukumanya Aye lukeelo luno byo Najikwiyanga pa matampulo a kwiya muno mu kishimikwa, inge bantu bonse baikala na luketekelo lutampe lwabaya, kasa babena kupembelela kajo ka kwiaula kabiji ne kusapwila. Kabiji ke kintu kyawama bingi pa kupwila kuno ne anweba, kabiji ne ku jibumba jibena kuteleka pa waileshi. Muji bavula bingi muno, baji. . .Naji kuya panshi pa kibamba kyalondelapo, ne kwamba ku bacheche. Kabiji namona bya kukabila byavula, lukatazho lwa muchima, kabiji ne misongo yapusanapusana pa mibiji yabo, kabiji tuji kuno na kulombelela bakolwa ne bamanyikwa.

³ Kabiji byo Najikufika peulu ya tampulo. . .Amiwa mbena kumona pa mwanamulume mukote. Waishile kwi amiwa, ne kwamba mba, “Mulongo Branham, myaka yapita kunyuma. . .” Waambile mba wajinga na lukatazho lwa muchima lwatama bingi. . .balangulukile mba usa kufwa. Kabiji wamulombejile, kabiji lusa lwa Lesa lwa mubukile. Kabiji uji muno lukeelo luno, pano uji na maeite, ujitu na lusekelo. Nanchi akyo kitulengela kwikala na luketekelo lupya.

⁴ Kabiji pano Amiwa mbena kukabila milombelo ya bantu baji mubyalo bibena kuteleka ku waileshi, kubikapotu ne muno. Panyuma ya Kufuma ku ino mpwijilo, Amiwa mbena kuya ku Europe, ne kokwa ku Africa ne kuzhokoloka, mu kupwila. Kabiji akwe kuya kwa kupichila mu kimwesho, nanchi kukekala kupwila kukatampe kokwa, Amiwa naketekela. Kabiji Naumvwine pa myaka yavula mba Nkambo ubena nkukeba mba mbwele jibiji. Wa kwikepesha pacheche, mwingilo wa kwikepesha Ye ampele amiwa, Amiwa kechi nalanguluka mba Aye wapwisha, kokwa ne. Kyamwekele nobe kwakonsha kwikala mweo kuntu kumo ye Nakonsha kukwata mu bukonde bwa Mamboawama, abwa bo ampele Aye bwakukwatako bantu, kupichila mu lubuko lwa Bulesa, kulombelela bakolwa. Kabiji Amiwa kine nalombako milombelo yenu, kwi anweba bantu baji muno ne abo, baji mu jibumba ja babena kuteleka ku waileshi.

5 Amiwa kechi njipo na kimye kya kutola kibaba ne kusapwila ne, akyo kyo Mbena kuketekela mu mamineti acheche muno mu—mu. . . mu kino kishimikwa, bino ne kwamba kwi—kwi anweba pa bimye bicheche, pakuuba mba mukwatakanye. Kabiji ku bantu baji pangye ya ino mpuzha, Amiwa nsakulombelela baji kusa, ponkapotu, kabiji ne anweba muno. Kabiji Amiwa kine nasekela pa kukumanya balunda bapya bawama Amiwa bokyangye kukumanyapo, na kwibakumanyatu lukeelo luno.

6 Twajinga na bimye bikatampe mu mpwijilo mu mampuzha akwabo. Amiwa kechi mfumapo bimye byavula ne, na kaswa bingi. Atweba tweseka kwikalatu bakaswa pakachi ka mukwakwa wa Jeffersonville, Indiana ne ku Tucson, Arizona, ako kotwavilukijile pa myaka icheche yapitapo, na kimwesho kya Nkambo, akyo kitutumine kookwa ku. . . kwakubula kuyuka ne ko Nailenga ne. Kabiji anweba bavula muji kuno, ku Clifton, Naambile kwi anweba pacheche kasa Kyangye kuya, kabiji ne ku mbung'eno ya ku Phoenix, pa kimwesho kyaishile. Namwene Bamalaika sebeni baji pamo.

7 Kabiji Nayuka mba, ku jibumba jibena kuteleka ku waileshi, kape anweba bavula kechi mwi ba Mamboawama apwijijika ne, akye kyakonsha kumweka nobe kya bu kyafyamika kwi anweba. Akyo, kyakonsha ne kwi amiwa, pakuuba kuji. . . Muntu yense wakonsha kulondolola kintu kiji kyonse, kechi wakonsha kwikitambula na lwitabilo ne. Ke bintu byo twakonsha kubula kulondolola, abyo byo twakonsha kwitaba na lwitabilo. Kechi twakonsha kulondolola Lesa ne. Kapaji muntu nangwa umo wakonsha kulondolola Lesa ne. Aye wiimenatu pa buke bwaji, kabiji Aye wabaya ne bulume. Atweba—atweba twikitambulatu mambo twayuka mba Aye uji konka. Kabiji konka kulwitabilo lwetu, mu kwikitambulwila, Aye ubwezha mukumbu kwi atweba, lubatizhilo lwa Mupashi Wazhila.

8 Akyo, Amiwa kyo nsakwambapo kwi anweba, mu bimye bicheche pano, pa, “Lesa” jishinda janji, nangwa, “kifulo kya bumpopweshi.” Kabiji kyo kyonka kifulo kyo wakonsha kumumpopwelapo Aye, kyo kyonka kifulo Aye kyo akonsha kukumanyapo, kuji. . . Kujitu Kipwilo kimo, kifulo kimo, kimye kimo, bantu bamo, mu byonse Lesa byo akumanya. Kabiji Naketekela mba Nkambo apeshe Mbila ku michima yenu muno.

9 Pano, kwiya ku Tucson, kyajinga kyenye, abya bimwesho bibena kwamba kwi anweba mu Jizhina ja Nkambo. Kechi pajipo nangwa kimo kyo Nakonsha kuvuluka, nakonsha kwipuzha uji yense inge wakonsha kuvuluka kimye kiji kyonse, amba inge Aye waambilepo kintu kiji kyonse kanatu kya Bukine. Kimye kyonse kimwekatu monka mo Aambila mba kikamweka.

10 Kabiji Aye wafwainwa kuuba, mwaila Binembelo, kubwela kwi atweba mu ano moba apelako, mu yuwe musango wa nyingijilo. Akyo kikekala panyuma ya lubatizhilo lwa Mupashi,

ne kwamba mujimi, kabiji ne lubuko lwa Bulesa, ne bikwabotu, bibye bintu. Kubikwa kwa kitungutungu kwa mbila ya ki Pentekosito kyo kyo tubena kwambapo leelo. Awe mwingilo wa Kilishitu Ayemwine mu kupashang'anya mukachi ka bantu Banji, na bintu bimo byonka byo Aubile kimye kyo Ajinga pano pantanda; mu Mubiji Wanji, aye Musongwa, ao ye lubaji Lwanji, ubena kuuba bintu bimoto, nobe Mulume ne Mukazhi, nangwa Mfumu ne Muka mfumu, kijilo kya Masongola kasa kikyangye kwikalako.

¹¹ Uno mulungu, inge Nkambo waswa, nasaka kwambapo bintu bimo pa kyokyo, amwa mu kipekenyi kyetu kuno, pa—pa Hotela wa Embassy, kabiji ne kukwatakanya mu jishinda jami ja kubilamo ja kwikepesha. Akya—akya kimye kabiji ne awala ye tubena kwikalamo, inge muntu kechi wayuka jishinda jakuyamo ne, ne bya kuuba nangwa mwakwalulukila, obewa—obewa kechi ubena kwenda mu lwitabilo ne; ubena kufwanyikizhatu, obewa ubena kufwanyikizhatu. Kabiji *kufwanyikizha* ke ku—ku “kuya kulutwe kwakubula luusa.” Nanchi inge kechi twaikalapo na nsambu ya kuyuka kintu Lesa kyo aambile mba kikobiwa mu kino kimye ne, mung'anyi jishinda ja kukumenyamo uno awala? Kabiji twafwainwa kwikikumanya, byo twayuka, konka ku lwitabilo lwa mu Kyambo Kyanji, bintu byafwainwa kumwekanyika pakino kimye, kabiji ne musango wa byaalo, musango wa bantu, musango wa kipwilo, ne bikwabotu.

¹² Twafwainwa kuyuka kyokyo, kabiji ne byo twafwainwa kwenda na kwikikumanya. Inge kechi mwayuka mwa kubila kyo kyo ne, obewa wi—wi kyokya kyo twaitanga mba, kiji nobe, kyalubankana lubankana; obewa watolokelamoto, kasa waketekela mba kisa kwikala kuno, kuketekela kikye kabiji ne kuketekela kyokya, kabiji “byo kikobiwa nyi?” Bino Lesa kechi ukeba atweba kuuba kyokyo ne. Aye ukeba atweba kuyuka kyo Aamba pa jino juba, kabiji ne kwikikumanya na lwitabilo, mambo Aye waambile mba kikekala muyewa musango. Nanchi atweba—atweba twayuka mba anweba mwi Bukine, mambo kechi muji na kyambo kya muntu ne; obewa uji na Kyambo Kyanji monka motwafwainwa kuubila. Kabiji tubena kuketekela mba Taata wetu Wamwiulu usa—usa kuswisha kikye uno mulungu.

¹³ Pano, Amiwa mundekeleko mambo pa Kuchibako, byo Naji kwambapo bimye bicheche bya pitapo, pa lwa kwiya ku Tucson. Kabiji Nalangulukile mba, amiwa mwine, amba ke mpelo ya bumi bwami. Nalangulukile mba kafwako nangwa umo wakonsha kwimana ku kyokya kikukuma kya yewa musango mo kyamwekejile mu kimwesho alwa lukeelo, pepi nobe teni koloko pa nzubo, awo wakonsha kwikala na bumi panyuma ya kyokya ne. Kika, Naile ku Tucson, na kunengezha na mwanami, mambo a mukazhi wami ne—ne baana bakaye nanji panyuma Amiwa naya, mambo Nalangulukile mba kyajinga mpelo yami. Kabiji

Ami, mu Phoenix kabiji ne mpwijilo yavula kunyuma kasa kikyanye kumweka, Amiwa ne mubuujiile mo kikamwekela.

¹⁴ Kyawama, bang'ondo bacheche panyuma ya kyokyo, Najinga mu Sabino Canyon lukeelo lumo, ujitu ku kabeta ka buyeke bwa Tucson. Najinga kokwa na kulomba. Kabiji kimye kyo Mbena kulomba, Nasutwile maboko ami peulu mu lubesha, kasa ng'amba mba, "Taata, Nalomba Anweba mba Anweba musa kukwasha jishinda jimo, mpai bulume, pa kimye kyo Natalang'ana nakyo pakino kimye. Kabiji inge mwingilo wami wapwa pano pantanda, nanchi Nafwainwa kwiya kwi Anweba. Kabiji kechi Mbena kwijizhang'anya pa kwiya ne, bino Nayuka mba Anweba mukalama kisemi kyami. Kabiji Amiwa—Amiwa mbena kwipuzha bulume pa kino kimye." Kabiji kintu kimo kyafikijile mu kuboko kwami!

¹⁵ Pano, jibumba jibena kuteleka ku waileshi, akye kyakonsha kumweka nobe kyenye kyo Naamba, bino kya bukine. Kabiji Lesa ye Mutonyi wami.

¹⁶ Natajile mu kuboko kwami, kabiji mwajinga mu mpoko, yajinga na kikwama kwakukwachila. Kabiji kya kukwachilako akyo kine kyajinga kyabulung'ana nobe jibwe ja buneme, kwakukwachila kwamwekele nobe-kyagolode. Kabiji aye—aye mwine mupenyi wamwekele nobe kyabembela, oo, kintu kiji nobe babikako kyela nangwa kintu kimo kibeka ku mute.

¹⁷ Bino, kyajinga pepi nobe teeni nangwa leveni koloko mu lukeelo, ponka peulu ya mutumba. Mwakonsha kulanguluka muntu nyi (byo Mbena kumvwa mba milanguluko yami Amiwa ijitu bulongo) wakonsha kumvwa kasa waimana byobya na mpoko kuyuka ne ko yafuma ne, bantu baji ma mailoshi ne ma mailoshi, kasa wikikwata mukubo kobe. Ne kumwine, natolele ne kusukenya mupenyi kulutwe ne kunyuma, abiji, kika, yajinga mpoko.

¹⁸ Kabiji Nakeketele kuzhokoloka. Naambile mba, "Kyawama, pano, akyo kyakonsha kumweka byepi? Pano miwa ponaimana, ponka, pano, kabiji kafwako uji pepi ne ma mailoshi na ma mailoshi, kabiji akya kyafumine kwepi?" Kabiji Naambile mba, "Kyawama, Na—Naketekela kapepo ke—aye Nkambo ubena kumbula mba ke kimye kyami kyapelako."

Kabiji Jiwi jaambile ne kwamba mba, "Aye yo Mpoko ya Nkambo."

¹⁹ Kabiji Nalangulukile mba, "Kyawama, mpoko, nanchi kiji...kiji nobe kya mfumu, ku bashilikale," mwayuka, byo baubanga mu England ne mampuzha apusanapusana. Nalangulukile mba, "Abyo ye mwingilo wakyo, ku bashilikale." Kabiji Nalangulukile mba, "Kyawama, kape Nafwainwa kubika maboko pa bantu, nangwa..." Najinga na misango yonse... Milanguluko ya bumuntu yakonsha kwikala yavulang'ana, mwayukatu. Anweba kechi mwayuka ne. Milanguloko yetu

yapelelela; Aye kechi wapelelela milanguluko ne. Nanchi, kabiji byo Najinga, kyaji. . . Ponkapo kyafumine mu kuboko kwami kabiji kechi Nayukile ko kyayile ne, kyazhimang’enetu. Kika, inge muntu kechi wakwatakanyapo nangwa pacheche ne pa bintu bya bumupashi, obewa—obewa wakonsha kwikala wavulang’ana byonkabya. Wakonsha kwimana byobyay, ke ukumye kika kyamweka.

²⁰ Kabiji Aye waambile mba, “Akya kimonwa kechi yo mpelo yobe ne. Ke kya mwingilo obe. Aya Mpoko kyo Kyambo. Atwa Tutetesho Tutanu na tubiji tukanshikulwa, byafyamika bya. . .”

²¹ Kabiji milungu ibiji panyuma ya kyokya, nangwa bang’ondo babiji, nangwa byonkabyo, panyuma ya kyokya, Najinga ku mutumba na jibumba ja balunda byo kyamwekele. Bamalaika Sebeni, kyajingatu nobe byonka byo waimana papo, bayishile lubilo kufuma Mwiulu. Mabwe mu mitumba aalumukile kabiji ne mushi ya tutumbatumba, kabiji—kabiji bantu baimene koka babijikilenga ne kuya, mwayukatu, kabiji lukungu lwajinga konse konse. Kabiji byo kyajinga byobyoy, Aye waambile mba, “Bwela ku muzhi obe. Pano kukekala, Malaika umoy uekela kamo katotwa tutetesho twa Tutetesho Tutanu na tubiji.”

²² Akyo, kiji pa tepu. Kabiji ne buuku katatakatu akalupuke, pa kino kimye babena kupitulukamo mu mulaka. Nobey byonka byo mwayuka, mulaka wami kechi wawama ne, kabiji bantu kechi bakonsha. . . Mwafwainwa kwikala bantu batemwa kabiji bayuka mwakukwakenya na mulaka wami. Bino umoy wafunda sukuulu wa mamboawama ubena kupitulukilamo mu mulaka, kabiji ne kufumyamo byonse bi—bi. . . Kyawama, kapepo naambile kyambo kyatama pakyokyo. Amiwa kechi nayuka ne. Nanchi, Naumvwine muntu umoy keaseke, nanchi Naketekela mba awa “mulaka” kechi wajinga bulongo ne. Kijitu pamo nobey mwina Holland, sendaitu monka moy kyalumbulukila kechi byo Ng’amba ne, kapepo.

²³ Pano ke maminetitu asatu, byo Nabuulwa, pa kuuba mba mutanchi apwe.

²⁴ Pano, anweba bantu batemwe baji muntanda ya kuteleka ku waileshi, kabiji ne anweba mwakolwa ne babena kukabila muno moy jibumba, mwakonsha kubika maboko enu pa umoy ne mukwabo ponkapano kimye kyo tuji na byambo bya milombelo bya bakolwa. Bino, Yesu waambile mba, Mwingilo wanji wapelako ku Kipwilo, “Abye biyukilo bikebalondela baitabila.” “Abo,” abo baketekela! “Inge bateteka maboko abo pa bakolwa, bakakosa.”

²⁵ Mutemwe Taata Wamwiulu, tuji pamo nobey baana leelo, tubena kukokela Anweba byo mwaambile mba ubai. Twabika maboko pa byonse bye byakukabila bya patelefoni. Anweba mubena kwibamona muyoya ntanda kokwa, byo baji bakabila, bya kumanama. Anweba mwibamona aba muno baji

na byakubila, bamanama. Kabiji twibapana kwi Anweba, mutemwe Lesa, nalulwe lwitabilo lwa mu Kyambo Kyenu kyo Mwaambile, “Abye biyukilo bikebalondelanga baitabila. Umvwe babika maboko abo pa bakolwa, bakakosa.” Kiswishai kye, Nkambo, mu Jizhina ja Yesu Kilishitu. Amena. [Kafwapo bijipo pa tepu ne—Waku.]

[Mulongo Branham wapezhako kwamba kutanshi kwa pa waileshi—Waku.]

☆☆☆☆☆☆

²⁶ Nakusachila, Mulongo Shakarian. Kyakine ke jishuko bingi pa kubwela jibiji na kwamba pa waileshi, kwambako ku balunda bamo baji mu ntanda ya waileshi, kabiji ne baji muno.

²⁷ Kabiji twatwajijila na kwimwita anweba, kwiya ku Hotela wa Embassy keesha mute, na kulombelelwa. Kabiji kechi kyonkakyotu ne, bino ne kuleta aba baji na bubu kabiji ne boba babwela panyuma. Inge twaikalatu na milombelo ya bakolwa, kabiji ne kumona Lesa kimye kyonse kasa abena kuuba byakukumya bikatampe, bino akyo ke kya bubiji. Kine kintu ke kupuluka, ne kuyulwa na Mupashi wa Lesa, akyo kyo Mbena kwamba kwi anweba mu kakimye kachechetu kuno, kabiji ne kufikilamo kwa kuuba mba twafwainwa kuyulwa na Mupashi wakwa Lesa.

²⁸ Kabiji lubuko lwa Bulesa kimye kyonse bukoka milanguluko ya bantu, ne kwibaleta mu Kyeenyi kya Lesa. Inge Lesa wauba kintu kimo kyo—kyo bayuka mba kya- . . . kyawama, kechi be kikwatakanya ne. Atweba kechi twakonsha kwi bumweshwa byo kyubiwa na busendwe ne. Lesa wikyuba mujishinda Janji Mwine jikatampe. Nanchi akya kikebula milanguluko ya bantu, pa kuyuka mba kuji Kyeenyi kya Bulume kuntu kumo, akyo kyakonsha kuuba kintu kimo kyakila pa kukwatakanya kwa bumuntu, kabiji akyo kibalengela kutala ku Mwanamukoko wa Lesa. Kabiji kimye kyonse, lubuko lwa Bulesa, Amiwa nabulwa, kabiji Naketekela, amiwa mwine, apo pepi nobe pakachi ka sikisite, kapepo, ne sebeta paseti, wa mwingilo wa Nkambo yetu, wajinga pa lubuko lwa Bulesa. Kabiji Aye waubile kikye pa kukebula bantu. Nanchi byo bajinga kokwa, Aye waambile mba, “Inge ne kungitabila mba Yami Iye ne, mukafwila mu bubu bwenu.”

²⁹ Pano, lubuko lwa Bulesa ke kitupa kikatampe kya kukokelako, kya kumona mba bantu batale kwi Nkambo Yesu. Kabiji Dokotala F. B. Bosworth, ao mwi anweba bavula, mwajinga balunda nanji, kabiji mwamuyukile, kabiji mwingilo waji waji na kilumbululo kyabaya kwi amiwa nobe wa mwingilo mwanyike. Natatwile mu mbung’eno yami, kabiji Natwelele mu Mulongo Bosworth. Aye waamba mba, “lubuko lwa Bulesa,” ke ng’ambilo icheche yakosa, aye waambile mba, “lubuko lwa Bulesa ke kiteyo kya kukanda.” Waambile mba,

“Anweba kechi mumweshwa jisabi kanda ne. Umumweshwa kiteyo, kabiji aye ulondelako kiteyo kabiji wakwatwa ku kanda.” Nanchi akyo kyo tweseka kuuba. Akyo kyo...atweba... Potwaimana ke kuleta bantu kwi Nkambo Yesu Kilishitu. Kabiji Aye ujitu pamo keesha, leelo, ne myaka yonse. Nanchi inge Aye wajinga Ubuka mu moba apita, Aye ye Ubuka ne leelo.

³⁰ Ke lushimunotu lwami Amiwa kasa kyangye kulombelela bakolwa mu mampuzha mo babena kuteleka ku waileshi. Kyajinga moba acheche kunyuma, Naikela mu mitumba amo mwamwekele kintu kikatampe ku meso a balongo fifitiini nangwa tweti, ako Malaika wa Nkambo po aikijile panshi, kabiji Kyeya kikatampe kyapichilenga na kuyemuka, na kusama kuzhokoloka mutumba, kabiji ne mabwe atumbukilenga mafiti tuu aduleendi, nangwa kukilapo, kukilang’anya ponkapa, na kuchiba peulu ya bichi. Kabiji Naimene mushi Yakyo. Kabiji nabulang’ene bang’ondotu bacheche kasa kikyangye kumweka, Amba kikekalako kabiji ne byonse bikamweka; kwambatu patoka, kyaambilwe juba ja kunyuma. Kabiji bonse banabalume banyemejilenga mushi ya bimbayambaya ne bintu byonse, na kweseka kufumako. Abo kechi bayukile kyamwekele ne. Kabiji Aye waambile kikamweka palutwe.

³¹ Naikale ku jije jibwe kokwa, ponka Aye po amwekejile, Najinga na—na mulunda umu wajinga ne atweba, ao wafumine kokwa ku Minnesota. Bantu banji baji muno lukeelo luno bino kechi Njina luketekelo lwa kuuba mba wafwainwa kwikala muno nangwa pa bibamba bikwabo. Wajinga Donavon Weerts, kabiji ne mulongo wawama mwanyike, waki Lutheran ao wafuminetu na kupana bumi bwanji kwi Kilishitu kabiji bayuzhiwe na Mupashi. Wikepesha bingi nsongwalume mwina German, uji pepi nobe myaka sate, ne kisemi, babiji nangwa basatu baana ba bacheche. Aye wavilukijile ku Tucson mu kukebatu kulamakana pamo ne amiwa, ako fili nangwa foolo aduleendi bamilukile na kukeba kulamakana ne amiwa. Nanchi aye...

³² Kabiji Amiwa nasekela pa kwikala na bonalamakana nabo ba musango yewa. Abo bandondela amiwa kufuma ku South Africa, kabiji ne konse konse, pakuuba mba bekaletu peepi ne kumona...ne amiwa, kabiji ne kwikala pamo ne amiwa kumvwa bulongo bya buwame bya Nkambo.

Awa ke mulongo wikepesha bingi, Amiwa kechi na mumwene bulongo ne.

³³ Mambo, bantu bo Nayuka kabiji ne bongikala nabo bajitu pamo nobe mulongo wami, ne nyenga. Nebamona, kabiji ne kumona ng’anyi, inge Nalanguluka mba babena kufumamo mu mulaini, kabiji ne kwibalupulamo kulubaji lumo ne kwisamba nabo, mambo Amiwa ne batemwa. Tubena kukeba kwikala mu Lukumo pamo. Kabiji bimye bimo kape, mu mpwijilo,

mwalanguluka mba ng'amba na kunshita kwi anweba. Akyo kechi kyafuma... akyo kechi ke mambo akuuba mba Amiwa nabula kwi mutemwa ne, bino kibena kufuma mku muchima wami, mambo Ami—Ami... Kyafwainwa kwikalatu jishinda jimo. Kujitu jishinda jimo ja kwingijila Lesa, kabiji ko kuuba mba... Kabiji twafwainwa kwikala mujishinda Janji, nangwa milanguluko yetu ikale byepi. Jishinda janji!

³⁴ Kabiji Namwene Donavon, kwapela kutwi kwanji kwa kilujo kwanji, kwajinga kwavimba pepi nobe bimye bisatu, kabiji kwamwekele kuchila bingi. Kyawama, pano nsaambena kulanguluka mba, amwa mu kiselebwa mobatu acheche, amo motwajinga, kapepo kwayile lusonga ku kutwi kwanji. Bino, pa kutola kubuko kwanji, Nataine mba kyajinga kaasa. Nanchi naambile kwi Donavon, Naambile mba, “Donavon, uji na... Akyo kyaikala bimye binga ku kutwi kobe?” Kyajingatu nobe kumutaya palepa, nobe kechi Nayuka ne. Naambile mba, “Kyaikala bimye binga koko, Donavon?”

Aye waambile mba, “Mulongo Branham, pepi nobe bang'ondo sikisi,” byo aambile.

Naambile mba, “Kika kyo wabujila kumbulakyo?”

³⁵ Aye waambile mba, “Oo, ku kumona wakaswa bingi,” waambile mba, “Amiwa kechi keba—kwikyuba ne.” Waambile mba, “Nalangulukatu mba kape kimye kimo Nkambo wakonsha kukubuula.”

Nanchi Naambile mba, “Bushe wayuka byo kiji nyi?”

Aye waambile mba, “Amiwa njina mulanguluko wawama.”

Naambile mba, “Abyo ibyo.”

³⁶ Kabiji lukeelo lwa bubiji, kechi kukila pa kyokyo ne, nakwachile nsongwalume pa kuboko, lukeelo lwa bubiji, kechi pajingapo ne mukovu pa kutwi kwanji ne. Kyajinga kyapwatu kyonse.

³⁷ Nanchi bimye byavula twikala, kabiji ne kweseka kufika ku *kikye, kyokyo*. Nangwa... Mwamona, ke, “Abye biyukilo bikebalondela baitabila.” Kechi kyaambiwa mba “inge balombelela bakolwa ne.” “Inge bateteka maboko pa bakolwa, bakakosa!” Twafwainwa kwikala na lwitabilo, atweba bene, mu byo tubena kuuba. Kijitu bulongo.

³⁸ Nanchi pano Donavon kapepo uji muno. Mukamusambakana. Aye ukekala kuno, inge kechi uji muno lukeelo luno ne, mubimba bikwabo. Obewa ukamukumanya, kabiji aye ukayuka lushimuno.

³⁹ Kabiji kika kikwabo kyo Nakonsha kwamba? Naketekela Luka, nangwa Yoano, umo, waambile mba ntanda kechi ya konsha kuku-... kukwata, uji na mabuuku akonsha kunembwa a byo mukachi ka bantu mu ano moba apelako; baanga bakolwa

babukwa, bashedwa bapokololwa, baji mu biumbi, kabiji ne misango yonse ya bikola ne bya lumanamo.

⁴⁰ Pano, anweba mubena kuteleka ku waileshi, pamotu ne kuno, Amiwa nakwata mumwe byakubila bikatampe byayula kuboko kupichilatu mu foni lukeelo luno, watwajijilatu na kuvuma kufumatu po twaishila kuno. Kabiji nanchi atweba. . . Wanu aduleendi ne naite-sikisi bya kukabila lukeelo luno, pa foni, kufuma po twaishila kuno. Nanchi twayai tunungakane mu milombelo pano nobe umo. . . Konse ko muji, muntanda momo, ibikai maboko pa umo ne mukwabo, inge mwi baitabila. Inge ne, bika kuboko kobe pa Baibolo nangwa kintu kimo koko, mu kimye kyo tubena kulomba kuno ne koko.

⁴¹ Mutemwe Taata Wamwiulu, lushimuno luhche lwa kwa Donavon Weerts, ke lumo lwa mu masauzande, Nkambo, amba Anweba muji bingi na lusa. . . Nalomba mba Anweba musakumona mu michima ya bantu bonse baji muno kabiji ne pa waileshi. Kabiji lekai, yense, abukwe. Lekai aye mubi ebafume, kabiji lekai bapokololwe ku byonse byalumanamo. Kiswishai kye, Taata. Mu Jizhina ja Yesu Kilishitu, Mwaana Wenu, twikipuzha. Amena.

Nemusachila Anweba, Nkambo. . . [Kafwapo
bijipo pa tepu ne—Waku.]

[Mulongo Branham wapezhako kwamba kwa pa waileshi kwakibiji—Waku.]

☆☆☆☆☆☆

⁴² Kyawama, kino ke kimye kya busatu lukeelo luno. Ami! Kabiji, mwayuka, kyaambiwa mba twafwainwa kufuma mu kishimikwa pepi nobe twelufu, mamineti fotiini, nangwa kintu kimo. Kabiji bakalama baamba mba, abo baji panshi popa, kabiji kechi bakonsha kuseya kajo ne. Kajo ketu kakutaya kimye kyalepa. Tuji na byalengela byavula, mwayukatu. Nanchi tuji na lwabaya, lwabaya bingi lusekelo pa kwikala bya bumupashi bikatampe, majiila a yubili, nobe byo Nakonsha kwikitela, lukeelo luno kuno na jije jibumba ja bantu bawama bingi.

⁴³ Nakonsha kutemwa kwa—kwamba mba atweba. . . kupwila jibiji, keesha mute ponka pa Embassy. Pano, tusa kulombelela bakolwa kokwa, kabiji twaketekela Lesa kwitukumanya. Kabiji Naiya na kubikamo lubaji lwami, mwingilo wami, mu kulengela (byonse byo twakonsha) ino mbung'eno kuuba mba ikale yafikizhiwa. Kechi yafikizhiwa mambo mbung'eno yetu ne, pakuuba yafikizhiwa bantu batana Yesu Kilishitu. Ako kokufikizhiwa. Mbung'eno iji yonse, nangwa tutakaike byepi Lesa, binga bintu bikatampe byo twamumona Aye kuuba, bimye binga Aye byo aamba kwi atweba mu Mupashi, kabiji ne bikwabotu; kanatu pajipo kintu kimo kyafikizhiwa, myeo imo yaletwa mu Bufumu!

⁴⁴ Kabiji Mulongo Shakarianne wa—waji kwamba ng'ambilo yawama ponka pano pa byo alangulukilenga pa ano moba o—o tubena kwikalamo. Amiwa kine naketekela kyokyo na muchima wami yense, amba tubena kwikala kimye kya kupezhako, monka mu—mu kivule kya mabaanga abufuku. Juba jaenda kuya kwalepa bingi. Kabiji inge twamona bintu kasa bibena kubiwa mu musango ye bijimo leelo, kika, kyakosa kwamba kisemi kikwabo bintu byo kikaleta. Moba acheche apitapo . . .

⁴⁵ Lekaitu ne mupepo ka kintu kamo kaji mukachi. Bapeselepelese monse mu Arizona, konka ko Ngikala, mu masukuulu onse. Bapele baana, abo bene kwakubula kuyuka ne, kupimwa kwa mubongo. Kabiji langulukai mbaka? Kubikapotu ne masukuulu akatampe ne—ne masukuulu afunda mulaka, kwajinga eite paseti wa baana bakatazhiwa na kubulwa bututulu bwa mubongo. Sebete paseti bajinga bakutamba televizhonyi. Monai, bubipisho, bafikiletu pe atweba kabiji kechi twa . . . Mukumyatu kika kyo bishila. Mwakonsha kumvwa Jiwi ja Lesa kasa jibijika amba kechi ubena kwikikeba ne, kabiji nangwa byonkabyo atweba—atweba twitana atweba bene mba twikasakanya monka.

⁴⁶ Lekai ne mubule kintu kimo kyakukumya. Monai, “Kechi bonse bang'ambila Amiwa mba, ‘Nkambo, Nkambo,’ bakatwelamo ne; kana bonka boba kyaswa muchima wa Ba Taata.” Kyaswa muchima Wanji kyo Kyambo Kyanji. Twakonsha kwikala babpopweshi bingi, ne kubijika, ne kutoloka, mu kukwe kupwila, akyo kyo tuji . . . Amiwa kechi mbena—Amiwa kechi mbena kukeba kwikala walupata ne. Bino Njina—na mwingilo wa kwingijila Lesa, kabiji ne yeo mwingilo ke wakwikala wakishika ne kwamba kyo Abena kunkeba amiwa mba ng'ambe. Kabiji Amiwa—Amiwa kine nasanta bingi pa kyapitala kya ku California abo baikala pamo ne amiwa—mu bintu byo nashininwamo. Inge Nabula kwamba byo nashininwamo, Amiwa ne kafutufutu kabiji kechi, Amiwa nishi kechi naikala wakishika kwi anweba ne. Kabiji inge kechi Nakonsha kwikala wakishika kwi anweba ne, Nakonsha kwikala byepi wakishika kwi Lesa? mambo Nemumona ne kwamba nenu. Mambo, tuuba, kwi Lesa, ne ako, bino twakonsha kwikala ba bukishika ne bukine umo na mukwabo. Atweba kine tuji mu—mu lukatazho, nkulo ya lukatazho. Bushe mwakimanapo . . .

⁴⁷ Lekai ne mupepo nsawakya umo mucheche wakupesapesa. “Kechi bonse bamba kwi Amiwa mba, ‘Nkambo, Nkambo,’ bakatwelamo ne; kana yewa uba kyaswa muchima wa Ba Taata.” Yesu waambile, pano pantanda, “Muntu kechi ukekela ku shinkwa bunke ne, kana ku Kyambo kyonse.” Kyambo Kyonse! Kechi ponka pano ne, ke Kyambo, kana ku Kyambo kyonse.

⁴⁸ Kyajingatu Kyambo kimo kyalengulwilwe, monka mwi Lesa . . . kya mu mikambizho ya Lesa, akyo kyaetele lufu, bulanda, kabiji ne misongo yonse ne kikola kya muchima,

kupusa Kyambo kya Lesa, Kyambo kimo! Inge kyasendele mutundu wa muntu mu lufu, pa kutupila, pa kulengulula Kyambo kimo, “kyakine,” kyakine. Bino Aye waambile mba kikamweka. Satana waambile mba, “Kinetu kechi kikobiwa ne.” Bino kyaubiwe.

⁴⁹ Nanchi, twafwainwa kulama Kyambo kyonse kyakwa Lesa. Kabiji inge bumuntu ne kumanama kwanji konse kabiji ne bintu bibena kupitamo muntundu wa muntu, ke mambo a kulondolwela mungi, nangwa—nangwa kubula kuketekelatu Kyambo kimo, pano tubena kubwela byepi na kutupilapo Kimo, inge kyaleta lonse lwe lupoto, kufika ne ku bumi bwa Mwaana Wanji?

... *bavula baitwa, ... bacheche basalwa.*

... *bavula baitwa, ... bacheche basalwa.*

⁵⁰ Amiwa kechi nakonsha kutola mutwe kufuma kukikye ne, bino, mambo kechi tuji na kimye ne, bino ke kwimushilatu kintu kimo.

⁵¹ Twayai tulanguluke pa...Naile juba jimo na Mulongo Shakarian, nkoba semunwinenga bang’ombe. Kabiji Namwene awa—awa...mu lambolitale amo mwatwezhezhe Mulongo Shakarian. kKabiji batwezhezhe muji malume a ng’ombe mulume, nobe kacheche...kaji nobe kaking’amba ng’amba kachechetu, ka mutwe ka makishi, kabiji batolele mulumba wa oa malume, kabiji babika mu galasi ibaisha bintu kufika ku binye ma aduleendi. Kabiji mwajinga tubishi twabumi tuheche na kutolauka monka mwa, mu oa malume. Akyo, kyotwayuka mba kakishi ka bumi kafuma ku mwanamulume, kabiji jike jifuma ku mwanamukazhi. Kabiji Naipwizhe sendwe kokwa, Naambile mba, “Ng’anyi kintu kibena kutolauka pacheche byobya?”

Aye waambile mba, “Atwa—atwa ke tu bang’ombe tulume ne tukazhi.” Mwamona?

Kabiji Naambile mba, “Monka mutotwa twametuka?”

Aye waambile mba, “Ee.”

⁵² Naambile mba, “Kapepo nanchi mu malume onse mwakonsha kwikala milyoni umo?”

Aye waambile mba, “Oo, ee.” Mwamona? Pano, mweshai bulongo.

⁵³ Pano, inge kikye kintu kikatampe kyaubiwa, mujitu jike jimo jibena kupembelela kakishi ka bumi mu yewa milyoni. Kabiji kafwako nangwa umo wakonsha kubulang’ana kana kepi kakishi, nangwa kana jepi jike. Inge mwakonsha kumona kusemwa kwa ku mubiji, kwaikala kwa bu kyafyamika kukila kwa—kukila kwa lusemo lwa bukisungu. Mambo, mu ao malume, muji kamo momwa katongwelwa jimo kwikala na bumi, kabiji ne twashala twafwa. Kabiji kechi kyakuuba mba

yenka mutanshi ye wakukumanya ne; kana yeka mutanshi wasambakana pamo na jike. Kapepo jike jakonsha kufumina kunyuma ya malume, nangwa pakachi ka malume; kakishi nako kakonsha kuubatu kintu kimo, ku jike. Kakishi kakalabila mu jike, kabiji ne kamukila kacheche kaponako, kabiji ponkapo longololo watatula. Kuji ka muyewa munshinshi yense, pa milyoni umo, wakonsha kwikifikizha, umotu yeka; kabiji ne kyokyo kitangijilwatu na Bulume bwabula kuyukanyikwa, ku muntu. Nangwa byonkabyo, konse, kajitu pamo, konse kakishi kajitu pamo natukwabo. Kjitu pamo ne mu banyama. Kijitu pamo ne mu muntu. Utangijilwa kana usakwikala nsongwalume, nsongwakazhi, mutwe-wachiluluka, mutwe-wafituluka, nangwa kya musango ka. Kitangijilwatu na Lesa. Bonsetu bamwekelatu pamo, mwaila kisemwa, bino muji umo momwa watongwelwa bumi; umo mu milyoni, bino bonse kasa bajitu musango umo.

⁵⁴ Kimye Isalela kyo afumine mu Ijipita, kwajinga pepi nobe bantu tuu milyoni balupukile pa kimye kimo. Bonsetu baumvwine mbila ya ngauzhi. Bonsetu bamwene Mumbulungwa wa Mujilo. Bonsetu babatizhiwe kwi Mosesa, mu Kalunga Kachila. Bonsetu baabijikilenga mu—mu Mupashi, bavumishenga ne bisekeseke ne kunyema peulu ne panshi ya kitulu, ne Milyama, kimye Mosesa kyo aaimbile mu Mupashi. Abo, bonse, batomenenga kufuma ku Jibwe ja bumupashi. Abo, bonsetu, bajilenga Manna kila bufuku. Bonsetu ba mwiabo! Bino kwajingatu babiji bafikile mu ntanda, umo kufuma mu milyoni umo.

⁵⁵ Kwesekwa kwajinga kuka? Bonse batomene ku Jibwe jimo, bonse bajile Manna a bumupashi nobe byonka byo tubena kuja lukeelo luno, pakuuba kwesekwa kwa Kyambo kya Lesa kwibashinikishe. Byo kyafikile pa kimye kya Kadeshi-beleniya, byo batatwile kuya mu ntanda yamulaye, kabiji kechi bayile ne poso byo baesekelwe na Kyambo. Kabiji bonse ba—bakwabo teni babwelele, ne kwamba mba, “Kechi twakonsha kwikyuba ne! Abo bantu bajitu nobe. . . Tujitu nobe batete kwi abo, ne mizhi yabo iji na bibumba. Bulwanyi bwabaisha.”

⁵⁶ Bino Yoshiwa ne Kaleba bazhindamikile bantu. Abo baambile mba, “Atweba twakonsha kwikyuba!” Kika? Lesa waambile mba, kasa bakyangye kuya, mu ntanda ya mulaye, “Nemupa anweba ntanda. Ne ipana kwi anweba. Ke yenu.” Bino kwajingatu umo mu milyoni umo.

⁵⁷ Muji kapepo faivi aduleendi milyoni batelwa-mba Benakilishitu mu ntanda leelo, kabiji juba jipwisha kisemi kimo. Kabiji pano, inge Lapicha yakonsha kwiya leelo kabiji ne bantu faivi aduleendi, ntanda yonse, bakonsha kusendwa mu Lapicha? Anweba kechi mwakonsha ne kuyuka nangwa mumapepalatu ne, lwa kuya kwabo. Kabiji Kwiya kwa Nkambo ke Kwiya

kwa bufyafya. Aye ukeya na kwiba watwala. Kikekalatu mu bacheche, poso. . .

⁵⁸ Byonka byo kyajinga mu moba baana babwanga byo baipwizhe Yesu, “Kika ba Banembeshi kyo bambila mba—mba Elaija wafwainwa kwiya patanshi?”

Aye waambile mba, “Waiya kala, kabiji kechi mwamuyukile ne.”

⁵⁹ Bushe mwalanguluka bantu kyo baubile nyi? Abo batwajijiletu na kuketekela mba Mala-. . . amba Mala-. . . Elaija ubena kwiya. Kabiji wajinga monka mukachi kabo, kabiji abo kechi bekiyukile ne.

⁶⁰ Nanchi byobyo kikekala ne mukimye kyakwiya Mwaana muntu! Abo bakoba Nanji mumusangotu umo. Aye Mupashi wakwa Lesa uji muno. Kyawama, tusa kuuba byepi Nanji? Bushe thena kuya na kuja Manna, kabiji ne bikwabotu, kechi kutwajijilatu nakuya byo tubena kukoma?

⁶¹ Bushe mwamonapo lukunwa, nobe byonka byajikwambanga Levalandi Pitts mu bimye bicheche byapitapo, kabiji ne lukunwa byo aponena mu mushiji? Yavula kunwa mo iji mu mushiji. Kimye Lesa kyo abakaminenga pa meema, na Kyeya, kabiji Kyeya kyaletetele, kitanshi Kyeenyi kya Lesa, Kyeya kyaambiwa kyaishile na Kyambo kya Lesa. Kabiji Kyambo kya Lesa kyo kyonka kintu kikileta Kyeya. Kabiji aa meema byo efungile, lukunwa wajinga waikala kala mu mushiji, kabiji akya Kyeya kyaletetele kunwa yonka yajinga na kakishi ka bumi mwi ayo, ya menene. Lesa ubena kulenga bilengwa Byanji.

⁶² Kabiji pano, pa lukeelo Lwakusangulwa kwajina Kyeya kikwabo kyaponene pantanda, kimye Mupashi Wazhila po apainwe. Kabiji Kyapewa kuleta Kyeya ku yoya Kunwa ayo Lesa, monka mukuyukila jimo Kwanji, wayukile mba bikekala pano pantanda. Nobe byonka byo Ayukile lukunwa mutanshi wa kumubiji, Aye wayuka kuji Lukunwa wa bumupashi. Mubiji wenu wajinga walala ponka pantanda, mu kimye kitanshi Lesa kyo aletele ntanda mba ikaleko. Atweba twi lubaji lwa ntanda. Atweba twalajile monka. Kabiji monka mu kuyukila jimo Kwanji Aye wayukile ng’anyi Ukamutemwa kabiji ne ukamwingijilanga Aye, kabiji ne yewa ukabula. Kwanji kuyukila jimo kubulang’ana. Inge kyabula kuyukanyikwa, nishi Aye kechi ye Lesa ne. Aye kuuba waikala Lesa kwakubula kwikala wabula mpelo ne. Kabiji inge Aye kechi uji na mpelo ne, Aye wayuka bintu byonse.

⁶³ Nanchi, mumona bantu ke boobe bilubo. Abo betutula mu kyokyo. Abo banyemena pa kyokyo, kabiji balanguluka kikye ne kyokya, bino kechi kingila bulongo ne, twikimona. Bino kuji kwingila bulongo, ako ke kutana kyaswa muchima kyalumbuluka kya kwa Lesa kabiji ne kwimana ponka, kyo akwichijile Lesa.

⁶⁴ Nobe byaji kwamba Mulongo Jack bimye bicheche byapita kokwa ku—ku Pershing Square, kivundang’anya kyonse. Umo jije jishinda, kabiji mukwabo joja jishinda; kabiji ne pa bafunda masukuulu a mamboawama, ne bikwabotu, amba mubena kukeba kuyuka bya masukuulu a mamboawama, mwaya konka.

⁶⁵ Naketekela mba kijitu pamo nobe mu Hyde Park ku London. Najinga konka, muntu yense uji na milanguluko yanji. Ke kya—ke kya buwame bwa juba-jakatataka ja ntanda ya Babilona.

⁶⁶ Bino mwajikumona nobe—nobe Mulongo Pitts byo ajikuya na mbila yaji yawama lukeelo kwi atweba? Byo ajikutatula kufumapo pa park, apa watanapo kikwibu kicheche kya Lusanguko. “Mukachi ka kyonse kivundang’anya,” byonka byo ekiletele kwi atweba, “kechi kwajingapo jishinda ja kwambilamo mba ‘ee’ nangwa ‘ine.’ Kyajinga bumi bwa Lesa bwa saminenga mwi akyo, mukachi ka kyonse kivundakanya.” Kyajinga byobya mu kubembela kwakyo, mambo Lesa wikitongwejile kwikala monka. Mukachi ka malwang’ano onse, kafwako nangwa umu wikimwenenga ne. Abo kechi bamwene mo kyatala mu bumupashi ne.

⁶⁷ Kabiji nanchi byokiji ne leelo mwaila kubungakana kukatampe ne mabumba, kabiji ne bipwilo, ne madinominesheni, ne bikwabotu. Umo ubena kukokela *jije* jishinda, “Twafwainwa kwikala ba Baptist, nangwa kwikala ba Presbyterian, twafwainwa kwikala *kikye*, *kyokya*, nangwa *kikwabo*.” Mukachi kabyo monse, muji jiluba jibena kukoma. Kuji bulume bwa Lesa monka mukachi ketu, bubena kukoma mukachi ketu atweba onse. Twayai tukimane twikimone, mu mamineti achechetu, kabiji kimonai uno mulungu, kabiji mwikimone kusololwa bulongo ku meso etu. Twaketekela mba Lesa ukekyuba. Bushe kechi ibyonyi? [Kipwilo kyaamba mba, “Amena.”—Waku.]

⁶⁸ Namona kuuba mba inge tuji patampulo ya panshi pa kino kimye. Nanchi twayai tulombe, umu umu.

⁶⁹ Lesa mutemwe, byo tubena kukunyika mitwe yetu mu Kyeenyi Kyenu, tubena kumvwa nobe kechi twafikilamo kwipuzha ne. Bino Anweba mwitulaille mba, inge twakonsha kwiya, Anweba kechi mwakonsha kwitukana ne. Kabiji ne iye ng’ambilo yashita yaambiwa, kechi kyalumbulula mba lufunjisho ne, “umo kufuma mu milyonyi,” bino nobe mwakuvulukila. Mambo Anweba mwaambile mba:

. . . twelai pa kibelo kyakepa, ne jishinda jakepa, byo bitwala ku bumi, kabiji bo bacheche be jimona.

Mambo bavula baitwa, bino bo bacheche basalwa.

⁷⁰ Anweba Taata Wamwiulu, tumai Kyeya kya Mambo awama kukilang’anya uno muzhi, kupita mu uno mulungu ubena kwiya wa mbung’eno. Kabiji inge pajipo Lukunwa uji yense, mu musango Obe Mwine mukatampe, mwaila lunengezho lwa

maana, nobe kweseka kwikimweshwa mu malume a mulume ne mukazhi, bitwajijile kufika ne mu kimye kya mbung'eno. Lekai aye Mupashi Wazhila ebape Kyeya. Twavuluka mba kimye kapepo kukila mo tubena kwikilangulukila. Twalomba, Lesa, amba byo tubena kwiya kuno, kasa tubena kuketekela mba kape pajipo kintu kimo papo kyafwaina kubiwa akyom kyakonsha kukwasha bantu, nangwa—nangwa kukwata yewa mukoko wapelako. Twayuka mba, inge kipaka kyayula, nanchi Kafunga ukashika kibelo.

⁷¹ Byonka byo kyajinga mu moba akwa Nowa, kimye membala umo wapelako wa kisemi watwela, Lesa washikile kizhilo. Kabiji baimbile ne kutwa, bino kyajinga kimye kypwa. Lesa Mutemwe, bajinga na jishuko.

Anweba mwaambile mba, “Amiwa yami Kibelo kya ku kipaka.”

⁷² Kabiji byo kyafikilamotu ku lwimbo wasapawilo, “Bushe naite naini kechi wafikilamo kwi Anweba nenyi? Bino, ine, kwajinga umo washajileko.” Aye wafwainwa kwikala mukoko mucheche wafita, nangwa kwafwainwa kwikala kafwako, wafwainwa kwikala mucheche mukazhi nangwa mulume. Atweba kechi twayuka kobaji ne, bino awa wapelako wafwainwa kutwela apa bino kibelo po kikashikiwa. Anweba Lesa, Mwayuka bintu byonse, palanguzhai bumi bwetu lukeelo luno. Kabiji tutuma konse ko twakonsha kuya, pa kuuba mba tukatane yewa wapelako, akya kibelo kyakonsha kushikika ne Kafunga kasa aji mukachi na mikoko. Kiswishai kye, Nkambo. Inge mujipo umo muno leelo, inge awa ye wafwainwa kwiya . . .

⁷³ “Bonse Bobampa kwiba Taata bakeya kwi Amiwa. Kabiji kafwako muntu nangwa umo wiya ne, kanatu Ba Taata bamukoka.”

⁷⁴ Kabiji inge kwaikalapo kiyukilo, nangwa ng'umvwino icheche, amba akye kyafwainwa kwikala kimye kya muntu umo mu jibumba, muno nangwa baji panshi, nangwa konse kobafwainwa kwikala, bakumbule, “Ee, Nkambo, Yami yewa mucheche ubena kupitang'ana na kufumako; kabiji awa wi Kilwisha, mu bumi bwami bonse. Na—Na—Nekyumvwine mba Nafwainwa kwiya, bino leelo Mbena kukobamina kulubaji lwashinda. Amiwa kechi nakonsha kuya peulu nangwa panshi ne. Amiwa kafwako ko nafwainwa kuya ne.” Oo, lekai Kafunga mukatampe eye, afike na maboko anekena kabiji ne kuleta yewa muno mu mutende, mubikai pa bipuzhi Byanji ne kumuleta na mutende.

⁷⁵ Kapepo kuji umo muno, Nkambo, awo wakolwa, mu musangotu umo, awo badokotala ye baambila mba, “Kafwako nangwa kimo kyakonsha kubiwa ne.” Aye waesekesha kwikipulusha. Kyafika po akonsha kubula kufika. Kechi kuji—kafwako kyo akonsha kuuba ne. Muchi wanji nangwa mupenyi

wanji kuuba wikikonsha ne. Bino, Anweba Nkambo, kechi pajipo kintu kiji kwalepa na kuboko kwenu kukatampe ne, kabiji Kyambo Kyenu ko kuboko Kwenu. Nanchi twalomba, Lesa Mutemwe, amba, lukeelo luno, kimye kyo tubena kwamba kwi Anweba, kyakuuba mba Anweba mufike panshi na kumutola awo wakolwa kabiji kechi wakonsha kwikwasha aye mwine ne, pakakalwa kufika mitanchi yonse ya masayaasi, kufuma kwi dokotala, lekai babukwe. Kiswishai kye, Nkambo.

⁷⁶ Kabiji byo tubena kulanguluka pe Davida, byonka byo apelwe luusa pa mikoko icheche, ichechetu. Bino juba jimo beyala waishile na kukwata ka mukoko kacheche ne kwikalupula, kabiji wafwaijilwe kwi kaja (nobe kaasa byo akonsha kuja mubiji), nangwa bokwe mukatampe. Pakuuba Davida, wabujile kwiningezha na—na laifo, nangwa, kechi bantu bamampoko ne, kana na malekenyi tu, aye walondejile yewa mukoko. Kabiji byo ataine awa—awa nyama waji pepi kwipaya ka mukoko kacheche, wamwipaile na malekenyi. Kyajingatu kilwilo kicheche kiji na pampa ne tambo, kabiji, bino wajinga na luketekelo mwi akyo.

⁷⁷ Atweba kechi tujipo na mukatampe wayuka bintu mukachi ketu ne, Nkambo. Twi bantu bakepa na milombelo icheche, bino tubena kwiya lukelo luno kulondela mikoko ya Bataata. Awa mwanamukazhi waendauka mikwakwa, na buyaji, kupepa fwaka, na kukeba mutende monka mufwaka; awa muntu wanusha sono ne kweseka kwiibwezha, pakuuba mulwanyi wamukwachijilatu; awa nsongwalume nangwa awa nsongwakazhi waeseka kuuba bulongo, aye kechi wakonsha kutana bulume bwa kufuma mu kintu kyatama ne; twaiya mu Jizhina ja Nkambo Yesu, na kwangata awa mukoko lukeelo luno. Atweba twakukana mulwanyi, mambo ke kintu kyapeelatu, malekenyi a milombelo, bino tubena kwiya na kubwezha mukipaka kya Bataata, pakuuba mba twakonsha kupana bukamonyi bwa byo bya bintu byapewa mu maboko etu. Lekai bulume bwa kwa Lesa bufike pa lwitabilo, monka mu michima ya bantu, kabiji lekai yewa mweo walubilamo lukeelo luno abwele. Lekai meseko a bunu bumi amulekeleko, ayenga. Kabiji lekai etane aye mwine pa bipuzhi bya Nkambo mu mutende, ne kubwezhiwa mu mutende jibiji. Twikipuzha mu Jizhina ja Yesu. Amena.

⁷⁸ Lesa emupeshe anweba bonse. Poso Nkemumona keesha, Amiwa napana mpwijilo ku Mulongo Shakarian. [Kafwapo bijipo pa tepu ne—Waku.]

[Mulongo Branham wapezhako kibese kyabusatu—Waku.]

☆☆☆☆☆☆

⁷⁹ Akye, Na—Naketekela mba anweba musa . . . kya kuuba mba inge Natana lusa lwavula ku meso akwa Lesa kabiji ne kwi anweba, naketekela mba kechi Nakonsha kwimana kuno na

kwimubuula kintu kimo kyatama ne. Napitajile pa myaka ya kusemwa fifite-sikisi, aja juba jikwabo. Akye kechi ke Mbila ya muntu mukote ne. Amiwa naketekejile kikye kufumatu kimye kyo Najinga nsongwalume mucheche. Kabiji inge akye kechi kyakine ne, Naikala ke muntu wakila bingi kukosama ao Lesa ye abika pantanda. Amiwa napana bumi bwami bonse na mambo aao Mambo. Kabiji lekai Ng'ambe kikye na bukishika: inge Najinga na bumi teni sauzande, Amiwa kechi nakonsha kupipula milanguluko yami ne.

⁸⁰ Pano, lubuko luji mu muntu yense. Vulukai, lubuko luji mwi anweba. Lesa wabikile mu kichi kya pichi yense pichi ukekala mwi akyo, Aye byo ekibyajile mu Bujimi. Monai, anweba mujitu. . . kichi kya pichi nangwa kichi kya epo, nangwa kichi kya kipangwa, kyafwainwa kukoma, na mambo akutoma meema mu mushiji. Pano anweba bonse muji nakoko kukosha mwi anweba, lwa kwi mupokolola, mambo ke Lesa, kufuma po wajimbijilwe mwi Kilishitu na lubatizhilo (kechi lubatizhilo lwa mumeema ne), lubatizhilo lwa mupashi. Anweba kechi mwakonsha kwiya mwi Kilishitu na lubatizhilo lwa mu meema ne. Monka mu lubatizhilo lwa mu mupashi!

⁸¹ Keesha mute, inge Nkambo waswa, Nkambanga pa kyokyo, *mvepi* kabiji *muka* mwa Kwikikajikila. Tukekala nakyo mute pakuuba mba kechi kyakonsha kukilang'anya na kupwila kwenu ne.

⁸² Pano monai, umo mwi anweba waimana muno nobe waitabila, monai, nanchi Bumi bwajinga mwi Kilishitu buji mwi obewa. Kyakonsheka, inge mwakonsha kwikimona!

⁸³ Ke mwingilo wakwa diabola kwi mukanya ku Kyokyo, kwimulamatu bumpofu. Aye wakonsha kwimulekatu kasa mwampofuka, ko kuuba mba, monai, obewa kechi wayuka mo ubena kuya ne. Muntu mpofu kechi wakonsha kubulang'ana ko abena kuya ne, aye wafwainwa kukeba kukwatakanya kufuma ku muntu wakonsha kumona. Poso twakonsha kuyuka, muntu umo wafwainwa kwitubuula bya Bukine.

⁸⁴ Kabiji Kilishitu wafwijile obewa, kabiji obewa wajimbulwa kufuma mu ntanda kuya mwi Kilishitu. Kabiji bintu byonse byo uekaba biji monka mwi obewa, mu lubatizhilo lwa Mupashi Wazhila. Abyo kechi ibyo nenyi? Pano kintutu kyo wafwainwa kuuba ke kutatulatu kutoma kufuma ku Kyokyo.

⁸⁵ Kabiji monka mutomena kichi, kitatula kulupula mabula, ne kusapuka, ne kupanga bipangwa pa mwaka pa mwaka. Kipangwa kechi kiji mu mushiji ne; kipangwa kiji mu kijimwa. Baanga baumvwa kyokyo, ambai mba "amena." [Kipwilo kyaamba mba, "Amena."—Waku.] nanchi, monai, kipangwa kiji mu kijimwa, kabiji kyonse kijimwa kitoma kufuma ku iye nsulo. Nobe byonka mvula byo inoka, ipana ku kijimwa, bumi, kwakutomena. Kabiji, byo kitoma, ke kikome.

⁸⁶ Kabiji kikoma poso kyaiya kyakoma mubukata, pamotu nobe Kipwilo byo kyauba, kusapuka mu ino nkulo.

⁸⁷ Kabiji, byo tutoma, tukoma. Pakuuba inge akya kichi kyakana kutoma, nanchi kijimwa kechi kyakonsha kukoma ne. Kabiji inge mwakonsha kwikiketekela ponkapano, nobe pabunke bwenu!

⁸⁸ Mambo, mwayuka Nkambo byo oba, umweshwa bintu byapusanako, ku byobya byo wauba kabiji ne byobya byo wafwainwa kubula kuuba, ne bikwabotu, mu mbung'eno. Twaji kuketekela mba Mupashi Wazhila wakonsha kupona pe atweba lukeelo luno kabiji ne kuuba byobyo, byo twaimana. Bino Natwajijiletu nakupembelela.

⁸⁹ Naketekela ke lubaji lwa lubazhibazhi, na kulanguluka mba panshi babena kwitukeba mba tufume muno, monai. Bino babena kukeba atweba; pano kimye kypapa.

⁹⁰ Bino ketekelai kikye, na muchima wenu yense. Ne musashijila kyubai. Inge Na—inge Natanwa na lusa ku meso enu, nobe muntu wabukine, ketekelai kikye. Pano bikai maboko enu pa—pa umo ne mukwabo.

⁹¹ Pano talai, pano, Baibolo kechi yaamba mba, “Abye biyukilo bikamulondelanga William Branham ne.” Kechi waambile mba, “Kika kalondela Oral Roberts yenkatu ne.” Kechi waamba mba bikalondela “Mulongo Kopp” nangwa “muntu umo ne.”

⁹² “Abye biyukilo bikebalondelanga,” bavula, “baketekela. Inge babika maboko abo pa bakolwa, bakakosa.” Ke bobwa bulume bwakwa Lesa buji mwi obewa, buleta Bumi ku muntu ye wabikapo kuboko kobe, ke nsulo ipana—Bumi ya Mupashi Wazhila.

⁹³ Lesa Mutemwe, mu Jizhina ja Yesu Kilishitu, mu kino kimye kya katazha apo kipwilo. . .lekai bemaneko payuwe sekondi, kwakubula lubazhibazhi, kabiji lekai Bulume kwasangwile Kilishitu kufuma mu kilende, sangululai kwi abo Bukine bwa Mamboawama, amba Yesu mwingilo wanji wajinga, inge ba “teteka maboko pa bakolwa, bakakosa.” Lekai bulume bonse bwa bademona, misongo yonse, bikola byonse, makatazho onse, kintu kimanyika kyamweka ku bantu, lekai kifumepo ponka pano ku lwitabilo. Nobe bantu baitabila, twikipuzha mu Jizhina ja Yesu Kilishitu. Amena.

⁹⁴ Pano sutulaiko maboko enu ne kumupa Aye lutakaiko, inge anweba mwaketekela mba Aye wikyuba.

⁹⁵ Lesa Mutemwe, awe mwaana usa kufwa, Nkambo, kanatu kikye kyaubiwa. Nazhachisha kikye kitumbwa, mu Jizhina ja Yesu Kilishitu. Lekai kimufume pa mwaana wabula mambo. Amena.

Bino, badokotala baeseke, kabiji bakakalwa. Ketekelaitu anweba.



UMO MU Milyoni KDE65-0424

(One In A Million)

Ino Mbila na Mulongo William Marrion Branham, yalupwilwe patanshi mu Kizungu pa Kibelushi lukeelo, 24 Mulombola, 1965, for the Full Gospel Business Men's Fellowship International breakfast pa Clifton's Cafeteria mu Los Angeles, California, U.S.A., byafumishiwa pa tepu ukwata ne kufyatula kabiji bya nembwa mu Kizungu kwa kubulwa kupimpulwa. Ino ntuntulwilo muki Kaonde ya nembelwe ne kusampanya na ba Voice Of God Recordings.

KAONDE

©2023 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org